



Pou Piblikasyon Imedya: 10/08/2022

GOUVÈNÈ KATHY HOCHUL

GOUVÈNÈ HOCHUL SIYEN YON LEJISLASYON KI VIZE KONBAT INEGALITE EKONOMIK KE NOUYÒKÈ TRANS-SEKSYÈL YO FÈ FAS

Lejislasyon (S.5933-A/A.8133) mande Depatman Travay la pou mennen etid sou travay moun trans-seksyèl yo nan New York

Gouvènè Hochul jodi a siyen lejislasyon (S.5933-A/A.8133) ki pral mande Depatman Travay la pou yo mennen yon etid sou pousantaj travay an tout eta a pou moun trans-seksyèl yo nan eta a, an konsiltasyon avèk Divizyon Dwa Moun lan. Yo pral itilize etid sa a pou detèmine si genyen yon diferans nan pousantaj travay ant Nouyòkè trans-seksyèl yo ak lòt rezidan yo nan Eta New York.

"Kòm bèsò mouvman pou egalite LGBTQ+, New York dwe toujou avanse pou asire ke tout Nouyòkè yo trete avèk diyite ak respè," **Gouvènè Hochul te deklare.** "Pandan twò lontan, moun trans-seksyèl yo -- espesyalman nan kominate koulè yo -- te fè fas ak gwo obstak pou reyisit ekonomik. Nou pa kapab aksepte sa. Gras ak nouvo lwa sa a, New York pral kapab etidyé inegalite sa yo pou nou kapab elabore solisyon lejislatif yo pou elimine yo yon fwa pou tout".

Nan fè yon sondaj nan tout eta a atravè Depatman Travay la an konsiltasyon avèk Divizyon Dwa Moun lan, yo ka redije lòt lejislasyon ki adapte espesyalman pou bezwen Nouyòkè trans-seksyèl yo. Etid yo nan tout eta a te dekovri ke moun trans-seksyèl yo fè fas ak pi gwo pousantaj chomaj, diskriminasyon nan travay, asèlman ak vyolasyon. Yon sondaj Biwo Kontwolè Vil New York la te revele pi gwo pousantaj sitiyasyon sanzabri pami moun trans-seksyèl nwa ak ispanik yo.

Senatè Eta Kevin S. Parker te deklare, "Gras ak adopsyon S5933A ak aplikasyon etid li sou travay moun trans-seksyèl nan eta a, nou ka anglobe done verifye yo sou moun trans-seksyèl defavorize yo fè fas pou yo jwenn travay ak manèv nan mache travay la. Yon etid preliminè Depatman Travay eta a ak Divizyon Dwa Moun li an fè pral ede asire ke yo pran mezi nesesè yo pou moun trans-seksyèl yo ka jwenn menm opòtinite pou yo viv tankou popilasyon jeneral la. Mwen bat bravo pou Gouvènè Hochul pou sipò konsistan li nan pwoteksyon dwa trans-seksyèl yo ak pou efò kontinyèl li pou asire ke tout moun yo trete san patipri".

Manm Asanble Amy Paulin te deklare, "Malerezman, moun trans-seksyèl yo toujou fè fas ak diskriminasyon ak lòt baryè pou jwenn ak kenbe travay. Etid sa a pral bay done nou bezwen antanke moun k ap fè politik pou nou kreye solisyon efikas pou mete fen nan diferans sa yo".

Gouvènè Hochul te yon defansè fèm pou kominate LGBTQ+ la. Nan premye bidjè li a, Gouvènè Hochul te travay avèk lejislati a pou mete yon envestisman istorik 13.5 milyon dola nan finansman sante ak sèvis sosyal pou LGBTQ+ epi li te egzije ajans eta yo pou mete yon deziyasyon sèks "X" disponib pou publik la sou fòmilè eta a ki kolekte enfòmasyon sa yo. Gouvènè Hochul te siyen tou gwo lejislasyon pou sipòte Nouyòkè LGBTQ+ yo, tankou kreye Fon Byennèt ak Ekite Trans-seksyèl Lorena Borjas ak Lwa Bilten Vòt ki Enklizif pou Sèks.

Direktris Egzekitif New Pride Agenda, Elisa Crespo, te deklare, "Nou kontan Gouvènè a ap siyen pwojè lwa trè enpòtan sa a ki mande Depatman Travay la etidyé sitiyasyon travay Nouyòkè trans-seksyèl yo. Pandan twò lontan moun trans-seksyèl yo te soufri gwo povrete ak inegalite revni. Nou pa ka tann pou n wè done enpòtan etid la ki pral pwodui epi plis toujou pou nou fè patenarya avèk eta a pou ede kreye lide inovatè ki pral ogmante sitiyasyon ekonomik anpil moun trans-seksyèl ki rele Eta New York lakay yo".

Direktè Egzekitif Destination Tomorrow, Sean Coleman, te deklare, "Yon lòt fwa ankò, Gouvènè Hochul montre manm yo nan kominate trans-seksyèl la ke li konprann kisa yon vrè alye ye. Plizyè fwa Gouvènè Hochul te siyen lejislasyon enpòtan ki pral gen gwo enpak sou lavi Nouyòkè trans-seksyèl chak jou yo. Siyati S.5933-A/A.8133 pral bay moun k ap defann trans-seksyèl yo done ki montre diferans ki genyen nan travay ak opòtinite travay, sa ki pèmèt diskisyon sou solisyon solid. Nou menm nan Destination Tomorrow aplodi Gouvènè Hochul pou lidèchip kontinyèl li".

Prezidan Equality New York, Teri Wilhelm, te deklare, "Kòm yon fanm trans-seksyèl, mwen reveye ak fado sa a chak jou ke tout moun trans-seksyèl, espesyalman fanm yo ak moun ki gen po nwa ak bren, pa resevwa yon opòtinite jis pou yo travay, jwenn yon travay aplantan oswa reyisi nan karyè. Gen omwen senk moun trans-seksyèl pou chak mil nan New York, men konbyen doktè, edikatè, bòs chapant oswa menm ganplwaye makèt ki reprezante kominate sa a? Se yon bagay detestab. Sepandan, ansanm avèk alye politik nou yo, aktivis yo ak gouvènè ki bay sipò sa a, lejislasyon sa a ta ka premye aksyon pou deplase moun ki gen plis dout epi kòmanse bati yon pi bon avni pou Nouyòkè trans-seksyèl yo".

###